

# Službene novine Federacije BiH, broj 49/00

Uzimajući u obzir, imajući na umu i konstatirajući sve gore navedeno, ovim donosim slijedeću Odluku koja stupa na snagu odmah, na privremenoj osnovi, sve dok Parlament Federacije ne usvoji ovaj zakon u odgovarajućoj formi bez ikakvih amandmana i uvjetnih klauzula uz tekst Zakona.

## **ODLUKA O IZMJENAMA I DOPUNAMA ZAKONA O PENZIJSKOM I INVALIDSKOM OSIGURANJU FEDERACIJE BOSNE I HERCEGOVINE**

Koristeći se ovlaštenjima koja su mi data članom V Aneksa 10. (Sporazum o civilnoj implementaciji Mirovnog ugovora) Općeg okvirnog sporazuma za mir u Bosni i Hercegovini prema kojem je Visoki predstavnik konačni autoritet u zemlji u pogledu tumačenja gore pomenutog Sporazuma o civilnoj implementaciji Mirovnog ugovora; i posebno uzevši u obzir član II 1. (d) istog Sporazuma prema kojem Visoki predstavnik "pomaže, kada Visoki predstavnik to ocijeni neophodnim, u rješavanju svih problema koji se pojave u vezi sa civilnom implementacijom."Pozivajući se na stav XI 2. Zaključaka Konferencije za implementaciju mira održane u Bonu 9. i 10. decembra 1997. godine, u kojima je Vijeće za implementaciju mira pozdravilo namjeru Visokog predstavnika da iskoristi svoj konačni autoritet u zemlji u pogledu tumačenja Sporazuma o civilnoj implementaciji Mirovnog ugovora, kako bi pomogao u iznalaženju rješenja za probleme u skladu sa gore navedenim "donošenjem obavezujućih odluka, kada to ocijeni neophodnim", o određenim pitanjima, uključujući i (prema podstavu (c) stava XI 2.) "druge mjere kojim se osigurava implementacija Mirovnog sporazuma na cijelom području Bosne i Hercegovine i njenih entiteta."Uzimajući u obzir da se u Aneksu IV 18. Madridske deklaracije Vijeća za implementaciju mira od 16. decembra 1998. godine navodi da "Vijeće naglašava potrebu za boljim rukovođenjem i punom transparentnošću javnog financiranja", te da Vijeće u Aneksu IV 19. poziva Entitete da provedu "sveobuhvatnu reformu penzijskog i zdravstvenog sistema na principima efikasnosti, finansijske održivosti i maksimalnog obezbjeđenja privatnog učešća."Konstatirajući da je u Deklaraciji Vijeća za implementaciju mira, koje se sastalo u Briselu 23. i 24. maja 2000. godine, navodi da "Vijeće poziva Visokog predstavnika da iskoristi svoje ovlasti u okvirima svoga mandata u cilju osiguranja pune i ubrzane implementacije Mirovnog sporazuma u svim njegovim civilnim sektorima, uključujući i uklanjanje prepreka koje stoje na putu ekonomske reforme."Konstatirajući da se u Deklaraciji iz prethodnog stava navodi da su izvjesne ekonomske reforme od kritičnog značaja, te da se u dijelu naslovljenom "Omogućavanje razvoja privatnog sektora" kaže da "Vijeće poziva nadležne organe da nastave sa opširnom reformom poreskog i carinskog sistema ....sistema socijalnog osiguranja.... i neodrživog birokratskog aparata na svim nivoima";Uzimajući u obzir ulogu i važnost održivog i transparentnog Penzijskog-invalidskog fonda za građane Bosne i Hercegovine;Osim toga, uzimajući u obzir da bi se amandmanima na Zakon o penzijskom i invalidskom osiguranju, između ostalog, osigurale redovne isplate penzija, spriječila akumulacija neisplaćenih obaveza i izbjegla neodgovorna praksa proizvoljnog povećavanja neodrživih iznosa penzija;S obzirom na činjenicu da je Parlament Federacije odbio usvajanje ovih neophodnih

amandmana; Zakon o penzijskom i invalidskom osiguranju objavljen u "Službenim novinama Federacije BiH", broj 29/98 od 23. jula 1998. godine ovim se mijenja na slijedeći način:

### **Član 1.**

1. U članu 32. nakon stava 1. Zakona o penzijskom i invalidskom osiguranju, dodaje se novi stav 2. koji glasi: "Penzijski osnov iz stava 1. ovog člana utvrđuje se na osnovu mjesečnog prosjeka plaća koje je osiguranik ostvario u: a) 2005. godini za 17 godina osiguranja; b) 2006. godini za 19 godina osiguranja; c) 2007. godini za 21 godinu osiguranja; d) 2008. godini za 23 godine osiguranja; e) 2009. godini za 25 godine osiguranja; f) 2010. godini za 27 godine osiguranja; g) 2011. godini za 29 godine osiguranja; h) 2012. godini za 31 godinu osiguranja; i) 2013. godini za 34 godine osiguranja; j) 2014. godini za 37 godina osiguranja; k) 2015. godini za 40 godina osiguranja." 2. Riječi: "od 15 godina" u stavu 4. mijenjaju se riječima: "od broja godina osiguranja utvrđenih u st. 1. i 2. ovog člana." 3. Raniji st. 2., 3. i 4. postaju st. 3., 4. i 5.

### **Član 2.**

1. Član 50. stav 1. mijenja se i glasi: "Starosna penzija se utvrđuje u procentu od penzijskog osnova prema dužini penzijskog staža. Za dvadeset godina penzijskog staža ona iznosi 45% od penzijskog osnova. Za svaku daljnju navršenu godinu, povećava se na sljedeći način: a) u 2001. godini za 1,90%; b) u 2002. godini za 1,80%; c) u 2003. godini za 1,70%; d) u 2004. godini za 1,60%; e) u 2005. godini i u sljedećim godinama za 1,50%." 2. Nakon stava 1. dodaje se novi stav 2. koji glasi: "Od 2005. godine starosna penzija ne može iznositi više od 75% od penzijskog osnova." 3. Raniji st. 2. i 3. postaju st. 3. i 4.

### **Član 3.**

1. U članu 51. st. 1., 2. i 3. se mijenjaju i glase: "Usklađivanje penzija utvrđenih u skladu sa odredbama ovog zakona vrši se mjesečno po potrebi, na osnovu sredstava dodijeljenih za isplatu penzija. Ukoliko penzijska sredstva koja posjeduje nosilac osiguranja (u daljem tekstu: raspoloživa sredstva) nisu jednaka troškovima, što podrazumijeva administrativne troškove i penzije u iznosu utvrđenom u skladu sa ovim zakonom za mjesec za koji se vrši isplata penzija (u daljem tekstu: troškovi), vrši se ponovni obračun penzija tako što se iznos penzija za taj mjesec množi dolje utvrđenim koeficijentom. U slučaju da su raspoloživa sredstva manja od troškova, koeficijent iz stava 2. ovog člana utvrđuje se tako što se sredstva potrebna za administrativne troškove i sredstva potrebna za isplatu svih penzija do minimalnog iznosa za taj mjesec oduzimaju od raspoloživih sredstava. Iznos potreban za isplatu minimalnog iznosa penzija svim penzionerima utvrđuje se množenjem broja korisnika penzijskog osiguranja sa minimalnom penzijom. Iznos koji se dobije kada se administrativni troškovi i penzije do minimalnog iznosa oduzmu od raspoloživih sredstava za taj mjesec dijeli se iznosom potrebnim da se izvrši isplata svim penzionerima u tom mjesecu, na osnovu penzije u iznosu utvrđenom u skladu sa ovim zakonom, nakon oduzimanja administrativnih troškova i iznosa potrebnog za isplatu minimalnih penzija svim penzionerima." 2. Nakon stava 3. dodaju se novi st. 4., 5. i 6. koji glase: "Kada su raspoloživa sredstva manja od troškova, sve penzije osim minimalne penzije množe se

koeficijentom iz stava 3. ovog člana. Koeficijent se primjenjuje na razliku između svake pojedine penzije u iznosu utvrđenom u skladu sa ovim zakonom za mjesec za koji se vrši isplata penzija i minimalnog iznosa penzije. U slučaju da su raspoloživa sredstva veća od troškova, koeficijent iz stava 2. ovog člana utvrđuje se oduzimanjem sredstava potrebnih za administrativne troškove od raspoloživih sredstava. Iznos koji se dobije oduzimanjem administrativnih troškova od raspoloživih sredstava dijeli se sa iznosom potrebnim da se izvrši isplata svim penzionerima u tom mjesecu, na osnovu penzije u iznosu utvrđenom u skladu sa ovim zakonom, nakon oduzimanja administrativnih troškova. Kada su raspoloživa sredstva veća od troškova koeficijent se odnosi na sve penzije. Svaka pojedina penzija utvrđena u skladu sa ovim zakonom množi se sa koeficijentom iz stava 5. ovog člana."

#### Član 4.

1. U članu 54. stav 2. riječi: "od 15 godina" se mijenjaju riječima: "od broja godina staža osiguranja u skladu sa članom 32. st. 1. i 2. ovog zakona." 2. U stavu 3. riječi: "od 15 godina" se mijenjaju riječima: "od broja godina staža osiguranja u skladu sa članom 32. st. 1. i 2. ovog zakona."

#### Član 5.

1. U članu 55. stav 1. riječi: "određuje se u visini od 85% od penzijskog osnova" se mijenjaju riječima: "ne može biti manja od iznosa starosne penzije za 40 godina penzijskog staža."

#### Član 6.

1. Član 56. se mijenja i dopunjuje tako da glasi: "Invalidska penzija u slučaju invalidnosti prouzrokovane bolešću ili povredom van rada određuje se u procentu u zavisnosti od broja godina penzijskog staža i pokrivenosti radnog vijeka penzijskim stažom, i iznosi:

Navršeni penzijski staž (godina)	Pokrivenost radnog vijeka penzijskim stažom 3/4 i više%	Pokrivenost radnog vijeka penzijskim stažom manje od 3/4%
do 20	50	47
21	51,67	48,87
22	53,34	50,74
23	55,01	52,61
24	56,68	54,48
25	58,35	56,35
26	60,02	58,22
27	61,69	60,09
28	63,36	61,96
29	65,03	63,83

30	66,70	65,70
31	68,37	67,57
32	70,04	69,44
33	71,71	71,31
34	73,38	73,18
35 i više	75	75

Invalidska penzija ne može biti veća od 75% od penzijskog osnova."

#### **Član 7.**

1. U članu 58. riječi: "od 85%" se mijenjaju riječima: "od 75%."

#### **Član 8.**

1. U članu 72. stav 1. poslije riječ "ostvarili" riječ "starosnu" se brišu, a poslije riječi "osnova" dodaju se nove riječi koje glase: "ili osiguranicima koji su ostvarili starosnu penziju sa 40 godina penzijskog staža i invalidsku penziju sa 35 godina penzijskog staža."

#### **Član 9.**

1. Poslije člana 72. dodaje se novi podnaslov 6.a. - Novčana naknada za fizičku onesposobljenost - kao i čl. 72.a, 72.b, 72.c i 72.d, koji glase:"6.a - Novčana naknada za fizičku onesposobljenost.

#### **Član 72a.**

1. Fizička onesposobljenost postoji kada je osiguranik pretrpio gubitak, ozbiljnu povredu ili značajanu onesposobljenost organa ili dijelova tijela što pogoršava prirodnu aktivnost organizma i zahtijeva veći napor za zadovoljavanje životnih potreba, bez obzira da li je na taj način prouzrokovana invalidnost ili ne. 2. Pravo na novčanu naknadu zbog fizičke onesposobljenosti stiče osiguranik čija je fizička onesposobljenost u iznosu od najmanje 30% nastala kao rezultat povrede na radu ili bolesti uzrokovane radom. 3. Vrste fizičke onesposobljenosti na osnovu koje se stiče pravo na novčanu naknadu kao i procenat takve onesposobljenosti utvrđuje se zakonom.

#### **Član 72.b.**

1. Osnova za novčanu naknadu za fizičku onesposobljenost je najniži iznos penzije utvrđen u skladu sa članom 72. ovoga zakona. 2. Novčana naknada za fizičku onesposobljenost se utvrđuje prema procentu fizičke onesposobljenosti i izražava se u odgovarajućem procentu od osnove, te iznosi:

Za fizičku onesposobljenost od	Stepen	Novčana naknada izražena kao procenat od osnove
100%	1	60%
90%	2	54%
80%	3	48%
70%	4	42%
60%	5	36%
50%	6	30%
40%	7	24%
30%	8	18%

#### **Član 72.c.**

1. Osiguranik ima pravo na novčanu naknadu od momenta nastupanja fizičke onesposobljenosti ukoliko je zahtjev za naknadu podnesen u roku od šest mjeseci od dana nastupanja fizičke onesposobljenosti. Ako je zahtjev podnesen nakon isteka predviđenog perioda, osiguranik ima pravo na novčanu naknadu od prvog dana u mjesecu nakon podnošenja zahtjeva kao i retroaktivno za šest mjeseci.

#### **Član 72.d.**

1. Ako je osiguranik za isti slučaj fizičke onesposobljenosti stekao pravo na novčanu naknadu i na osnovu ovog zakona i na osnovu drugih propisa, u tom slučaju može po sopstvenom izboru koristiti bilo koji od ova dva osnova za naknadu."

#### **Član 10.**

1. U članu 128. stav 1. riječi: "Zavoda za platni promet Federacije BiH", se mijenjaju riječima: "organizacija nadležnih za platni promet".

#### **Član 11.**

1. Ovaj zakon se objavljuje bez odlaganja u "Službenim novinama Federacije BiH" i stupa na snagu nakon isteka perioda od 21. dan po objavljivanju.

Broj 57/00 12. novembra 2000. godine Sarajevo

Visoki predstavnik **Wolfgang Petritsch**, s. r.